

Ol Key Biodiversity Area

Biodaevesiti

Biodaevesiti hemi ol difren kaen laef oganisim we oli stap long ol graon mo solwota ekosistem. Ol sistem we oli kat hae biodaevesiti oli save givim moa ekosistem sevis from oli kat fulap difren oganisim we wok blong olgeta i dif difren mekem se wan wan i givim difren gudfala samting long ol man mo ekosistem we oli stap long hem. Blong katem storian, biodaevesiti hemi mekem najurel envaromen hemi helti mo hemi givim ol risos long ol man, osem fres wota, helti graon mo meresin.

Ol Biodaevesiti Hotspot

Ol biodaevesiti hotspot hemi ol rijen we oli kat hae level blong endemik plan we oli kro long graon be ova long 70% blong olgeta najurel bus blong olgeta i bin lus finis mekem se olgeta oli treten. Endemik hemi minim se olgeta we oli kro long wan ples ia nomo long wol. I kat 35 biodaevesiti hotspot long wol mo East Melanesian Islands hemi wan long olgeta. Ol hotspot ia oli kavaremap wan smol pesentej blong wol nomo be oli sapotem ova long haf blong evri endemik spisis blong plan mo 43% blong ol endemik pidjin, mamol, reptael mo amfibien.



Eria we oli Protektem

Wan eria we oli protektem hemi kat ol klia mak se i stat wea mo i finis wea mo insaed i kat biodaevesiti we oli givim ol ekosistem sevis long yumi mo oli impoten long kastom blong yumi. Taem yumi protektem olgeta tru long loa mo komuniti i stanap stron tugeta, bae yumi save konsevem ol najurel resos ia blong mekem se long fuja, ol pikinini blong yumi tu bae oli save luk mo enjoyem ol risos ia. Ol KBA oli ol rijen we oli impoten bigwan long saed blong biodaevesiti mo we ol konsevesen grup long komuniti oli save protektem mo usum save blong saens mo lokol save blong manejem.



Source: Ray Pierce Pacific

Key Biodiversity Area (KBA)

Wan KBA hemi wan eria we i: kat biodaevesiti we i stap long denja blong lus; biodaevesiti ia i stap long wan smol eria nomo; save sapotem hae biodaevesiti; kat ol proses we oli impoten long wan ekosistem; mo i kat olgeta biodaevesiti we sapos oli lus, bae yumi nomo save karem bak olgeta. Olgeta spisis mo ekosistem ia bae oli save stap long graon, fres wota mo solwota mo bae secretri blong KBA bae hemi mas konfemem. Vanuatu hemi kat 27 KBA. Aot long 27 KBA ia. CEPF hemi jusum six blong wok wetem mo olgeta oli:

- Gaua
- Santo Mountain Chai,
- Tongoa-Laika
- Green Hill
- Futuna
- Aneityum

